

**Aalisarnermut immikkoortitat pillugit Inatsisartut inatsisaata allanngortinnissaanut
 Naalakkersuisut peqquneqarnissaannik Inatsisartut aalajangiiffigisassaattut
 siunnersuut, taamaalilluni isaterinissamut tapiissutinik akiliuteqarnermi
 aalisarsinnaanermut akuersissutit siunissami atorunnaarsinnissaat
 periarfissaajunnaassalluni**

(Inatsisartunut ilaasortaq Hans Enoksen, Partii Naleraq)

pillugu

Aalisarnermut, Piniarnermut Nunalerinermullu Ataatsimiititaliap

ISUMALIUTISSISSIONTAA

Siunnersuutip aappassaaneerneqarnerani saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Nikolaj Jeremiassen, Siumut, siulittaasoq
 Inatsisartunut ilaasortaq Michael Rosing, Demokraatit, siulittaasup tullia
 Inatsisartunut ilaasortaq Suka K. Frederiksen, Siumut
 Inatsisartunut ilaasortaq Siverth K. Heilmann, Atassut
 Inatsisartunut ilaasortaq Aqqaluaq B. Egede, Inuit Ataqatigiit
 Inatsisartunut ilaasortaq Ane Hansen, Inuit Ataqatigiit
 Inatsisartunut ilaasortaq Hans Enoksen, Partii Naleraq

Ull. 5. maj 2015-imi siullermeerinerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Aalisarnermut aningaasaliissutinut immikkoortitat pillugit Inatsisartut inatsisaat allanngorteqqullugu Naalakkersuisut siunnersuutikkut peqquneqassapput, taamaalilluni isaterinissamut tapiissutinik akiliuteqarnermi aalisarsinnaanermut akuersissutit siunissami atorunnaarsinnissaat pingaarnertut maleruagassaajunnaassalluni.

Siunnersuut aalisariutinik nutarterinermik kinguneqassasoq naatsorsuutigineqarpoq, tassami angallatinik piginnittut arlallit isaterinissamut tapiissutinik qinnuteqarnissaat naatsorsuutigineqarmat.

Siunnersuutip Inatsisartunit siullermeerneqarnera

Siunnersuut Demokraatit eqqaassanngikkaanni partiinit tamanit taperserneqarpoq. Aammattaaq siunnersuut Naalakkersuisunit taperserneqarpoq, Naalakkersuisullu paasissutissiissutigaat aalisarnermut aningaasaliissutinut immikkoortitat allanngortinneqarnissaannut siunnersuut tusarniaassutigereersimagitsik. Siunnersuutip kingunerissavaa isatereernerup kingorna akuersissutip pigiinnarneqarsinnaanera. Siunnersuut UKA2015-imi saqqummiunneqartussatut naatsorsuutigineqarpoq.

Ataatsimiititaliap siunnersummik suliarinninnera

Siunnersuut partiinit annertuumik taperserneqartoq – aammalu Naalakkersuisut siunnersuut taperseraat ataatsimiititaliamit maluginiarneqarpoq.

Aammattaaq isaterinissamut tapiissutit tunniunneqartarerat pillugu maleruagassat oqilisarneqarnissaannik siunnersummum matumunnga akuersaartumik aalisarnermut aningaasaliissutinut immikkoortitat allanngortinneqarnissaat pillugu immikkut siunnersummik Naalakkersuisut saqqummiussereersimasut ataatsimiititaliamit maluginiarneqarpoq. Siunnersuut ull. 6. februar - 13. marts 2015-imi tamanut tusarniutigineqartoq UKA2015-imi saqqummiunneqartussatut naatsorsuutigineqarpoq.

Tunngavissat pigineqartut tunngavigalugit annertunerusumik oqaaseqarnissamut ataatsimiititaliami amerlanerussuteqartut tunngavissaqarsorinngillat.

Siunnersuutip aningaasaqarnikkut kingunerisassai

Siunnersuutip akuerineqarnera aningaasat atugassiissutaareersut saniatigut aningaasaqarnikkut pisortanut kinguneqassanngitsoq aalajangiiffigisassatut siunnersummi oqaatigineqarpoq. Taama naliliineq Naalakkersuisunit apeqquserneqanngilaq, taamaattumillu annertunerusumik oqaaseqaateqarfinginissaanut ataatsimiititaliaq tunngavissaqarsorinani.

Ataatsimiititaliap inassuteqaatai

Ataatsimiititaliami amerlanerussuteqartut Siumup, Inuit Ataqatigiit, Partii Naleqqap amma Atassutip siunnersuut **akuerineqassasoq inassutigaat**.

Ataatsimiititaliami ikinnerussuteqartut Demokraatit ima tunngavilersuuteqarlutik siunnersuut **itigartinneqassasoq inassutigaat**:

Tassa aalisartup akiitsunik annertuunik artukkerneqarsimanani aalisarnermit tunuarsinnaanissa isaterinissamut tapiissuteqartarermut tamarmiusumut tunngavigineqarmat. Aammalu isaterinissamut tapiissutinik pissarsinerup kingorna aalisarnermik ingerlatsisinnaanermut akuersisarneq aalisarnermut aningaasaliissutinut

immikkoortitat siunertareqqaagaannut akerliummat, taakkumi siunertarisimammassuk angallatinut imminut akilersinnaasunut pisassiissutinik atugassiinissaq.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassangortippaa.

Nikolaj Jeremiassen,
Siulittaasoq

Michael Rosing,
Siulittaasup tullia

Suka K Frederiksen

Siverth K Heilmann

Ane Hansen

Aqqaluaq B Egede

Hans Enoksen